

LIGJ
Nr. 81/2026

**PËR DISA NDRYSHIME DHE SHTESA NË LIGJIN NR. 48/2014, “PËR PAGESAT
E VONUARA NË DETYRIMET KONTRAKTORE DHE TREGTARE”, I
NDRYSHUAR¹**

Në mbështetje të neneve 78, 81, pika 2, dhe 83 të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

Në ligjin nr. 48/2014, “Për pagesat e vonuara në detyrimet kontraktore dhe tregtare”, i ndryshuar, bëhen këto ndryshime dhe shtesa:

Neni 1

Në nenin 3 bëhen këto ndryshime dhe shtesa:

a) Pikat 2, 3, 10, 11 e 12 ndryshohen si më poshtë:

“2. “**Autoritet publik**” është çdo autoritet kontraktor, siç përcaktohet në legjislacionin për prokurimin publik, pavarësisht nga objekti apo vlera e kontratës;

3. “**Subjekt tregtar**”, në kuptim të këtij ligji, është çdo organizatë, person fizik ose juridik, me përjashtim të autoriteteve publike, që ushtron në mënyrë të pavarur një veprimtari ekonomike ose profesionale dhe që, në kuadër të kësaj veprimtarie, kryen transaksione tregtare. Në këtë kuptim, përfshihen, ndër të tjera, tregtarët, shoqëritë tregtare, si dhe organizatat jofitimprurëse që janë të angazhuara ose veprojnë në kuadër të një veprimtarie ekonomike ose profesionale të pavarur.

...

10. “**Norma bazë e interesit për lekun**” është norma e interesit të marrëveshjeve të riblerjes dhe të anasjella të riblerjes (REPO dhe REPO të anasjella), e miratuar me vendimin e Këshillit Mbikëqyrës të Bankës së Shqipërisë, ose norma marginale e interesit, që rezulton nga procedurat e ankandit me normë të ndryshueshme për këto operacione;

11. “**Norma bazë e interesit për zonën “euro”**” është norma e interesit të operacioneve kryesore të rifinancimit, e miratuar me vendimin e Këshillit Drejtues të Bankës Qendrore Evropiane, ose norma marginale e interesit, që rezulton nga procedurat e ankandit me normë të ndryshueshme për operacionet më të fundit kryesore të rifinancimit të Bankës Qendrore Evropiane;

12. “**Norma bazë e interesit në monedhë të huaj**” është norma e interesit të operacioneve kryesore të rifinancimit, e miratuar nga organet kompetente të bankave qendrore, që emetojnë monedhën, në të cilën është bërë pagesa, ose norma marginale e interesit, që rezulton nga procedurat e ankandit me normë të ndryshueshme për operacionet e rifinancimit të këtyre bankave qendrore.”.

b) Pas pikës 14 shtohet pika 15 me këtë përmbajtje:

“15. “**Kamatëvonesë për pagesat e vonuara**” është kamatëvonesa ligjore për pagesën e vonuar ose kamatëvonesa me një normë të rënë dakord me marrëveshje ndërmjet subjekteve tregtare, në përputhje me nenin 13 të këtij ligji.”.

Neni 2

¹Ky ligj është përafruar plotësisht me:

Direktivën 2011/7/BE, të Parlamentit Evropian dhe të Këshillit, datë 16 shkurt 2011, “Për luftën kundër pagesave të vonuara në transaksionet tregtare”. Numri CELEX 32011L0007, Fletorja Zyrtare e Bashkimit Evropian, seria L, nr. 48, datë 23.2.2011, faqe 1–10.

Kudo në ligj togfjalëshi “sipërmarrjet tregtare” zëvendësohet me togfjalëshin “subjekt tregtar”.

Neni 3

Nenet 6 dhe 7 ndryshohen si më poshtë:

“Neni 6

Afatet e pagesës dhe të drejtat e kreditorit në transaksionet ndërmjet subjekteve tregtare

1. Në transaksionet tregtare ndërmjet subjekteve tregtare, kreditori ka të drejtë të përfitojë kamatëvonesë pa qenë i nevojshëm dërgimi i një njoftimi apo kujtese për pagesë, nëse janë përmbushur kushtet e mëposhtme:

a) kreditori ka përmbushur detyrimet e tij kontraktore dhe ligjore;

b) kreditori nuk e ka marrë pagesën në afat, përveç rasteve kur debitori vërteton se nuk është përgjegjës për vonesën.

2. Përfundimisht nga rregullat e përgjithshme të ekzekutimit të detyrimeve të parashikuara në Kodin Civil, dispozitat e këtij ligji rregullojnë në mënyrë të posaçme afatet dhe lindjen e së drejtës së kamatëvonesës për transaksionet tregtare.

3. Kur kushtet e pikës 1 të këtij neni janë përmbushur, kamatëvonesa llogaritet:

a) nga dita vijuese pas datës ose përfundimit të afatit të pagesës të përcaktuar në kontratë;

b) nëse data ose afati i pagesës nuk është përcaktuar në kontratë, me kalimin e:

i. 30 (tridhjetë) ditëve kalendarike nga data e marrjes së faturës ose e një kërkese ekuivalente për pagesë nga debitori;

ii. 30 (tridhjetë) ditëve kalendarike nga data e marrjes në dorëzim e mallrave a shërbimeve ose e një kërkese ekuivalente për pagesë nga debitori, nëse data e marrjes së faturës është e pasigurt;

iii. 30 (tridhjetë) ditëve kalendarike nga data e marrjes në dorëzim e mallrave a shërbimeve ose e një kërkese ekuivalente për pagesë nga debitori, nëse debitori e ka marrë faturën përpara marrjes në dorëzim të mallrave a shërbimeve;

iv. 30 (tridhjetë) ditëve kalendarike nga data e përfundimit të procedurës së marrjes në dorëzim ose të kolaudimit të mallrave a shërbimeve ose e një kërkese ekuivalente për pagesë nga debitori, nëse një procedurë e tillë është e parashikuar me ligj ose në kontratë, dhe faturën debitori e ka marrë përpara ose në datën e kryerjes së këtij verifikimi.

4. Kohëzgjatja maksimale e procedurës së marrjes në dorëzim ose të kolaudimit të mallrave a shërbimeve nuk mund të kalojë 30 (tridhjetë) ditë kalendarike nga data e marrjes në dorëzim të mallrave ose shërbimeve, me përjashtim të rasteve kur palët kanë rënë dakord shprehimisht ndryshe në kontratë dhe kjo zgjatje nuk përbën një kusht të padrejtë kontraktor, sipas nenit 10 të këtij ligji.

5. Afati i pagesës i përcaktuar në kontratë ndërmjet subjekteve tregtare nuk mund të kalojë 60 (gjashtëdhjetë) ditë kalendarike, përveç rasteve kur në kontratë është rënë dakord shprehimisht ndryshe dhe me kusht që ky afat të mos jetë qartësisht i padrejtë ndaj kreditorit.

Neni 7

Afatet e pagesës në transaksionet me autoritetet publike

1. Në transaksionet tregtare, ku debitori është një autoritet publik, kreditori ka të drejtë të marrë kamatëvonesë ligjore pa qenë i nevojshëm dërgimi i një njoftimi, kur janë përmbushur kushtet e mëposhtme:

a) kreditori ka përmbushur detyrimet e tij ligjore dhe kontraktore;

b) kreditori nuk ka marrë shumën e detyrimit në kohë, përveç rasteve kur debitori vërteton se vonesa nuk ka ardhur për shkak të rrethanave që nuk varen prej tij.

2. Kur afati i pagesës nuk është përcaktuar në kontratë, kamatëvonesa fillon të llogaritet automatikisht pas kalimit të afatit prej 30 (tridhjetë) ditësh kalendarike, nga:

a) data e marrjes prej debitorit të faturës ose të një kërkesëpagese të njëvlershme;
b) data e marrjes në dorëzim të mallrave a shërbimeve, kur data e marrjes së faturës është e pasigurt ose kur debitori e merr faturën përpara mallrave ose shërbimeve;
c) data e përfundimit të procedurës së dorëzimit ose të kolaudimit nëse kjo procedurë parashikohet me ligj ose në kontratë, dhe debitori e ka marrë faturën përpara ose në datën kur kryhet ky dorëzim ose kolaudim.

3. Afati i pagesës i përcaktuar në kontratë nuk mund të kalojë 30 (tridhjetë) ditë kalendarike. Ky afat mund të zgjatet deri në një maksimum prej 60 (gjashtëdhjetë) ditësh kalendarike vetëm nëse është rënë dakord shprehimisht në kontratë.

4. Kur ligji ose kontrata parashikon një procedurë dorëzimi apo kolaudimi për verifikimin e konformitetit të mallrave a shërbimeve, kohëzgjatja e kësaj procedure nuk mund të kalojë 30 (tridhjetë) ditë kalendarike nga data e marrjes së mallrave ose shërbimeve. Çdo kusht kontraktor ose dokument tenderi, që parashikon një afat më të gjatë, është i pavlefshëm.

5. Data e marrjes së faturës nuk mund të jetë subjekt i një marrëveshjeje kontraktore ndërmjet debitorit e kreditorit. Çdo kusht kontraktor, që synon shtyrjen e datës së marrjes së faturës është i pavlefshëm.

6. Kamatëvonesa llogaritet automatikisht nga dita e nesërme e përfundimit të afateve të përcaktuara në këtë nen, pa qenë nevoja për njoftim formal apo kërkesë vënije në vonesë, sipas rregullave të përgjithshme të Kodit Civil.”.

Neni 4

Në nenin 10 bëhen këto ndryshime:

a) Titulli i nenit zëvendësohet me “Afatet e marrjes në dorëzim të mallrave ndërmjet subjekteve tregtare”;

b) Në pikën 1 fjalët “nga e nesërmja e mbërritjes së mallit në destinacionin e përcaktuar” zëvendësohen me fjalët “nga data e marrjes në dorëzim të mallrave ose shërbimeve”.

Neni 5

Pika 2 e nenit 16 ndryshohet si më poshtë:

“2. Në këto raste, detyrimi së bashku me kamatëvonesat ligjore dhe/ose kontraktore dhe me dëmshpërblimin për shpenzimet për rikthimin e kredisë mund të vihen në ekzekutim të detyrueshëm, në përputhje me dispozitat e Kodit të Procedurës Civile. Gjykata lëshon urdhrin e ekzekutimit brenda 90 (nëntëdhjetë) ditëve kalendarike nga data e paraqitjes së kërkesës në gjykatë, me kusht që deri në momentin e lëshimit të urdhrin të ekzekutimit, debia ose elemente të procedurës të mos jenë kundërshtuar nga debitori.”.

Neni 6

Dispozita kalimtare

1. Dispozitat e këtij ligji zbatohen vetëm për transaksionet tregtare dhe kontratat e lidhura pas hyrjes në fuqi të këtij ligji.

2. Për detyrimet e autoriteteve publike ndaj subjekteve tregtare, të lindura dhe të paekzekutuara para hyrjes në fuqi të këtij ligji, nuk zbatohen parashikimet e këtij ligji. Këto detyrime rregullohen sipas dispozitave të ligjit në fuqi në kohën e lindjes së tyre.

3. Detyrimi për zbatimin e afateve të përcaktuara në nenin 7 të këtij ligji fillon 6 (gjashtë) muaj pas hyrjes në fuqi të tij. Gjatë kësaj periudhe, autoritetet publike, në bashkëpunim me ministrinë përgjegjëse për financat, hartojnë planin e shlyerjes graduale të stokut të detyrimeve.

Neni 7

Hyrja në fuqi

Ky ligj hyn në fuqi 15 ditë pas botimit në Fletoren Zyrtare.

Miratuar në datën 23.7.2026.

**Shpallur me dekretin nr. 463, datë 31.7.2026 të Presidentit të Republikës së Shqipërisë,
Bajram Begaj.**